

摘藻堂四庫全書薈要

史部

欽定四庫全書薈要卷九千四百二十七

史部

文獻通考卷一百七

鄱陽馬端臨貴與著

王禮考二

朝儀

開元中蕭嵩奏每月朔望皇帝受朝於宣政殿先列仗衛及文武四品以下於庭侍中奏外辦上乃步自西序門出升御座朝罷入自御座起步入東序門然後放仗

散臣以為宸儀肅穆升降俯仰衆人不合得而見之乃請備羽扇於殿兩廂上將出所司承旨索扇扇合上坐定乃去扇給事中奏無事上將退又索扇如初今以為常

八年中書門下奏曰冬至一陽生萬物潛動所以自古聖帝明王皆此日朝萬國觀雲物禮之大者莫逾是時其日亦祀圜丘皆令得攝官行事質明既畢日出視朝國家以來更無改易緣脩新格將其日祀圜丘遂改用

小冬日受朝若親拜南郊受朝須改既令攝祭理不可
移伏請改正從之因勅自今已後冬至日受朝永為常
式至天寶三載十一月五日甲子冬至勅伏以昊天上帝
義在尊嚴恭惟祀典每用冬至既於是日有事圜丘
更受朝賀實深兢惕自今已後冬至宜取以次日受朝
仍永為常式至永泰二年十一月三日詔以十三日甲
子冬至令有司祭南郊於含元殿受朝賀至建中二年
十一月二十日敕宜以冬至受朝賀

二十五年御史大夫李通之奏每至冬至及緣大禮應朝參官併六品清官並服朱衣餘六品以下許通著袴褶如有褻故准式不合著朱衣袴褶者其日聽不入朝自餘應合著而不著者請奪一月俸以懲不恪制曰可天寶六載敕中書門下奏承前諸道差使賀正十二月早到或有先見或有不見其所賀正表但送省司又不通進因循日久於禮全乖望自今已後應賀正使並取元日隨京官例序立便見通事舍人奏知其表直送四

方館元日仗下後一日同進敕旨依

肅宗乾元三年敕員外郎五品以上常參官自今已後

非朔望日許不入賊平之後依舊常參

時安史據河洛

代宗廣德二年敕常參官遇泥雨准儀制令停朝參今
軍國事殷若准式停恐有廢闕泥既深阻許延三刻傳
點待道路通依常式

德宗建中元年十一月朔御宣政殿朝集使及貢士見
自兵興以來典禮廢墜州郡不上計內外不會同者二

十五年至此始復舊典

州府計吏至者一百七十有三

二年正月朔御含元殿四方貢獻列為庭實復舊例也

御史中丞竇參奏准儀制令泥雨合停朝參伏以軍國

事殷恐有廢缺請令每司長官一人入朝有兩員併副

貳亦許分日其夜甚雨至明不止許令仗下到廊食訖

入中書其餘官及王府長官並請停朝任於本司勾當

公事泥雨經旬亦望准此

是年舉故事置武班朝參其廊下食等亦宜加給

貞元七年詔常參官入閣不得奔走其有司以下喪者

禁褻服朝會復衣綾袍金玉帶

初金吾將軍沈房有弟喪公服不衣褻服入門上問
宰臣董晉對曰准式朝官有司以下喪者許服絕縵
衣不合淺色上曰南班何得有之對曰因循而然又
曰在式朝官皆以綾為袍五品以上服金玉帶取其
文綵華飾以奉上也昔尚書郎含香此意也

十五年膳部郎中歸崇敬以百官朝服袴褶非古禮上
疏云按三代典禮兩漢史籍並無袴褶之制亦未詳所

起之由隋代以來始有服者事不師古請罷之奏可

憲宗元和元年三月准吏部兵部尚書侍郎郎官并禮部侍郎御史中丞武元衡奏前件等司近起十月至來年三月稱在選舉限內不奉朝參令式無文禮敬斯闕一年之內半歲不朝去貞元十二年中丞王顏奉敕釐革載在明文尋又因循輒自更改若以兵吏禮部舉選限內事繁即中書門下御史臺度支京兆府公事至重朝請如常又況旬節已賜歸休常參又許分日一月之

內才奉十日朝參其間甚熱甚寒皆蒙頒放臣以為王
顏舉奏甚詳當時敕文甚備准貞元十一年四月敕旨
自今以後永為常式他年妄改條請臺司彈奏庶使
班行式叙典法無虧依奏

二年御史臺奏文武常參官准乾元元年敕如有朝堂
相弔慰及跪拜待漏行立不序談笑喧譁入衙門執笏
不端行立遲慢至班列立不正趨拜失儀言語微喧穿
班仗出閤門不即就班無故離位廊下食行坐失儀語

開入朝及退朝不從正衙出入非公事入中書每犯奪
一月俸今商量舊條每罰各減半有犯必舉不敢寬容
如所由指揮尚抵拒飾非即請准舊例錄奏貶官從之
十年三月壬申朔御延英殿召對宰臣故事朔望日御
宣政殿見羣臣謂之大朝元宗始以朔望陵寢薦食不
聽政其後遂以為常今之見宰臣特以事召也

武宗會昌二年中書門下奏元日御含元殿百官就列
惟宰相及兩省官皆未索扇前立於欄檻之內及扇開

便侍立於御前三朝大慶萬邦稱賀惟宰相侍臣同介
冑武夫竟不拜至尊而退酌於禮意事未得中臣商量
請御殿日昧爽宰相兩省官對班於黃案前俟扇開通
事贊兩省官再拜拜訖升殿侍立從之

昭宗天佑二年敕漢宣帝中興五日一聽朝歷代通規
宜為常式今後每月只許一五九日開延英計九度其
入閣日仍於延英日一度指揮如有大段公事中書門
下具榜子奏請開延英不計日數

三年敕文武百僚每月一度入閣於貞觀殿貞觀大殿
朝廷正衙正至之辰受羣臣朝賀比來視朔未正規儀
今後於崇勲殿入閣

唐開元禮

皇帝正至受羣臣朝賀儀

前一日尚舍奉御設御幄於太極殿北壁下南向鋪御
座如常守宮設羣官客使等次於東西朝堂太樂令展
宮懸於殿庭設麾於殿上西階之西東向一位於樂懸

東南西向鼓吹令分置十二按於建鼓之外乘黃令陳
車輅尚輦奉御陳輿輦尚舍奉御設解劍席於懸西北
橫街之南並如常儀典儀設文官三品以上位於橫街
之南道東

襲聖侯於三品之下

介公鄺公於道西武官三品以上

於介公之西少南每等異位重行北面相對為首設文
官四品五品位於懸東六品以下於橫街南每等異位
重行西面北上設諸州朝集使位都督刺史及三品以
上東方南方於文官三品之東重行北面西上西方北

方於武官三品之西重行北面東上四品以下皆分方
位於文武官當品之下諸州使人分方位於朝集使下
亦如之設諸親位於四品五品之南

皇宗親在東
異姓親在西

設諸

方客位三等以上東方南方於東方朝集使之東每國
異位重行北面西上西方北方於西方朝集使之西每
國異位重行北面東上四等以下分方位於朝集使六
品之下重行每等異位設典儀位於懸之東北贊者二
人在南少退俱西面奉禮設門外位文官於東朝堂每

等異位重位西面

襄聖侯於三品之下

介公鄩公於西朝堂之前

武官於介公之南少退每等異位重行東面諸親位文

武官四品五品之南

皇宗親在東異姓親在西

設諸州朝集使位東

方南方於宗親之南每等異位重行西面西方北方於

異姓親之南每等異位重行東面諸州使人分方位於

朝集使之下亦如之諸方客位東方南方於東方朝集

使之南每國異位重行西面北上西方北方於西方朝

集使之南東面北上其日依時刻將士填街諸衛勒所

部列黃麾大仗屯門及陳於殿庭如常儀羣官諸親客
使集朝堂皆就次各服其服侍中版奏請中嚴太樂令
帥工人入就位協律郎入就舉麾位諸侍衛之官各服
其器服符寶郎奉寶俱詣閤奉迎典儀帥贊者先入就
位吏兵部主客戶部贊羣官客使俱出次通事舍人各
引就朝堂前位又通事舍人引四品以下及諸親客使
等應先置者入就位侍中版奏外辦皇帝服袞冕
冬至則服
通天冠御輿以出曲直華蓋警蹕侍衛如常儀皇帝將

絳紗袍

出仗動太樂令令撞黃鍾之鐘右五鐘皆應協律郎俛
伏舉麾鼓祝奏太和之樂鼓吹振作以姑洗之均皇帝
出自西房即御座南向坐符寶郎奉寶置於御座如常
協律郎偃麾戛敔樂止通事舍人引王公以下及諸方
客使等以次入就位

皇太子若來朝則皇太子朝
出訖典謁引公王以下入

公初

入門舒和之樂作至位樂止羣官客使等立定典儀唱
再拜贊者承傳羣官客使等皆拜訖通事舍人引上公
一人詣西階公初行樂作至解劍席樂止公就席脫舄

跪解劍置於席俛伏興通事舍人引升階進當御座前
北面跪賀稱某官臣言

賀詞與太子同
唯稱尊號為異

賀訖俛伏興通

事舍人引降階詣席後上公跪著劍俛伏興納烏樂作
復橫街南位樂止羣官客使等俱再拜侍中前承詔降
詣羣官東北西面稱有制羣官客使等皆再拜宣制曰
履新之慶與公等同之

冬至云履長之
慶與公等同之

宣訖羣官客使

等皆再拜訖舞蹈三稱萬歲訖又再拜侍中還侍位初
羣官將朝中書侍郎以諸州鎮表別為一案俟於右延

明門外給事中以祥瑞案俟於左延明門外俱令史絳公服對舉案侍中給事中俱就侍臣班於客使入戶部以諸州貢物陳於太極門東西廂禮部以諸藩貢物最可執者蕃客手執入就內位其重大者陳於朝堂前初上公將入門中書侍郎降引表案入詣西階下東面立給事中降引祥瑞案入詣東階下西面立上公將升賀中書令黃門侍郎俱降各立階下初上公升階中書令黃門侍郎各取所奏之文以次升上公賀訖中書令前

跪奏諸方表訖黃門侍郎又進跪奏祥瑞訖俱降置所
奏之文於案各還侍立侍郎與給事中引案退至東西
階前案遂出侍郎給事還侍立初侍中宣制訖朝集使
及蕃客皆再拜訖戶部尚書進詣階間北面跪奏

其尚書奏

仍待黃門侍郎奏祥瑞訖

稱戶部尚書臣某言諸州貢物請付所司

俛伏興侍中前承制退稱制曰可尚書退復位禮部尚
書以次進詣階間北面跪奏稱禮部尚書臣某言諸蕃
貢物請付所司俛伏興侍中前承制退稱制曰可尚書

退復位侍中還侍位太府率其屬受諸州及諸蕃貢物
出歸仁納義門執物者隨之典儀曰再拜通事舍人以
次引北面位者出公初行樂作出門樂止侍中前跪奏
稱侍中臣某禮畢俛伏興還侍位皇帝興太樂令令撞
蕤賓之鐘左右五鐘皆應奏太和之樂鼓吹振作皇帝
降座御輿入自東房侍衛警蹕如來儀侍臣從至閤樂
止通事舍人引東西面位者以次出

蕃客先出其冬至
受朝則不奏祥瑞

貢物又無
諸方表

會

朝訖太樂令設登歌於殿上引二舞入立於懸南面尚
舍奉御鋪羣官升殿者座文官三品以上於御座東南
西向

褒聖侯於
三品之下

介公鄼公於御座西南東向武官三品

以下於介公鄼公之後朝集使都督刺史及三品以上
東方南方於文官三品之後西方北方於武官三品之
後蕃客三等以上東方南方於東方朝集使之後西方
北方於西方朝集使之後俱重行每等異位以北為上

設不升殿者座各於其位又設羣官解劍席於懸之西
北橫街之南並如常儀尚食奉御設壽罇於殿上東序

之端西向設坫於罇南加爵一太官令設升殿者酒罇
於東西廂近北設殿庭羣官酒罇各於其座之南皆有

坫羣俱幃以帷施設訖吏部兵部戶部主客贊羣官客
使俱出次通事舍人各引就朝堂前位典儀帥贊者先

入就位通事舍人各引升陞者次入就位侍中版奏外

辨皇帝服通天冠絳紗袍

冬至則不改服

御輿以出曲直華蓋

警蹕侍衛如常儀皇帝將出仗動太樂令撞黃鍾之鐘
右五鐘皆應奏太和之樂鼓吹振作皇帝出自西房即
御座南向坐符寶郎奉寶置於座如常樂止典儀一人
升就東階上西面立通事舍人引王公以下及諸客使
以次入就位公王初入門樂作至位樂止羣官客使立
定

若朝會日別設位贊拜陳引如朝
禮其日二舞與工人俱入就位

侍中進當御座前

北面跪奏稱侍中臣某言請延諸公王等升俛伏興又
侍中稱制曰可侍中詣東階上西面稱制延公王等升

殿上典儀承傳階下贊者又承傳羣官客使皆再拜侍
中還位羣官拜訖通事舍人引應升殿者詣東西階公
初行樂作至解劍席樂止公王以下各脫舄跪解劍置
於席上俛伏興通事舍人接引上公一人升階少東西
面立定以下各立於座後立定光祿卿進詣階間跪奏
稱臣某言請賜羣臣上壽俛伏興侍中稱制曰可光祿
卿退詣酒罇所西面立通事舍人引上公詣酒罇所北
面立尚食奉御酌酒一爵授上公上公緡笏受爵通事

舍人引上公進到御座前北面授殿中監殿中監受爵
進置御前上公執笏通事舍人引上公退北面跪稱某

官臣某等稽首言元正首祚

冬至云天
正長至

臣等不勝大慶

謹上千萬歲壽俛伏興再拜羣官客使等上下俱再拜
立於席後侍中前承制退稱敬舉公等之觴羣官客使
等上下又再拜殿中監取爵奉進近臣遞進皇帝舉酒
休和之樂作羣官客使等上下皆舞蹈三稱萬歲皇帝
舉酒訖殿中監進受虛爵以授尚食奉御奉御受爵復

於圻樂止初殿中監受虛爵殿上典儀唱再拜階下贊者承傳羣官客使等上下皆再拜通事舍人引上公就座後立殿上典儀唱就座階下贊者承傳羣官客使等上下俱就座俛伏坐太樂令引歌者及琴瑟至階脫履於下升就位坐其笙管者進詣西階間北面立尚食奉御進酒至階殿上典儀唱酒至興階下贊者承傳羣官客使等上下皆俛伏起立於席後殿中監到階省酒尚食奉御奉酒進皇帝舉酒太官令又行羣官酒酒至殿

上典儀唱再拜階下贊者承傳羣官客使等皆再拜搢
笏受觶殿上典儀唱就座階下贊者承傳羣官客使等
上下皆就座俛伏坐飲皇帝初舉酒登歌作昭和之樂
三終尚食奉御進受虛觶復於坳登歌訖降復位觴行
三周尚食奉御進御食食升階殿上典儀唱食至興階
下贊者承傳羣官客使等上下皆執笏俛伏起立座後
殿中監到階省案尚食奉御品嘗食訖以次進置御前
太官令又行羣官案

御若不食羣官案
先上訖不須興

設食訖殿上典

儀唱就坐階下贊者承傳羣官客使等上下皆就座俛
伏坐皇帝乃飯休和之樂作羣官客使等上下俱飯御
飯畢樂止仍行酒遂設庶羞太樂令引二舞以次入作
若賜酒侍中承詔詣東陛西面稱賜酒殿上典儀承傳
階下贊者又承傳羣官客使等上下皆執笏俛伏起再
拜搯笏立受觶就席俛伏坐飲訖俛伏起立授虛爵執
笏又再拜就坐酒行十二徧會畢殿上典儀唱可起階
下贊者承傳羣官客使等上下皆俛伏起立席後通事

舍人引降階俱詣席後跪著劍俛伏興納舄樂作復橫街南位樂止位於殿庭者仍立於席後立定典儀曰再拜贊者承傳羣官客使等在位者皆再拜

位於殿庭者拜於席後

若有敕賜物待中前承制降詣羣官東北西面稱有制羣官客使等又再拜通事舍人引羣官客使以次出公初行樂作出門樂止待中前奏稱侍中臣某言禮畢俛伏興還侍位皇帝興太樂令令撞蕤賓之鐘左右五鐘皆應奏太和之樂鼓吹振作皇帝降座御輿入自東房

侍衛警蹕如來儀侍臣從至閤樂止通事舍人引東西

面位者以次出

蕃客先出

皇帝若服翼善冠袴褶則京官著

袴褶朝集使著公服

升座者履如式

若設九部樂則去樂懸

無警蹕太樂令帥九部伎立於左右延明門外羣官初

唱萬歲太樂令即引九部伎聲作而入各就座以次如

式

貞元二年敕應文武百官朝謁班序

中書門下

侍中中書令同中書門下平章事各以本官序

供奉官

左右散騎常侍門下中書

侍郎諫議大夫給事中中書舍人起居郎及舍人左右補闕左右拾遺通事舍人在橫班序 若入閣

即各隨左右省其御史大夫中丞侍御史

左在殿中侍御

史

右在通事舍人

分左若橫行參賀辭見

御史大夫在散騎常侍之上中

丞在諫議大夫之下

御史臺

御史大夫在三品官之上別立中丞在五品官之上別立

留守副

元帥都統節度使觀察使都團練都防禦使并大都督

大都護持節兼者即入班在正官之次餘官兼者各從

本官班序

御史在六品班之後

諸使下無本官唯授內供奉裏行

者即入班亦在正官之次有本官兼者各從本官班序

如本官不是常參官并憲官是攝者唯聽於御史班中
辭見殿中省官監少監尚衣尚舍尚輦奏御分左右隨
繖扇立若入閣亦如之

一品班 三太三公太子三太嗣郡王散官開府儀同
三司國公等同班

二品班 尚書左右僕射太子三少京兆河南牧大都
督大都護散官特進光祿大夫爵開國郡公開國縣
公并上柱國同

三品班 六司尚書太子賓客九寺卿國子祭酒三監
京兆等七府尹詹事親王傳中都督上都護下都護
下都督上州刺史五大都督府長史上都督府都護
散官金紫光祿大夫爵開國侯勳上護軍護軍

四品班 尚書左右丞六司侍郎太常少卿左右庶子
祕書少監餘七寺少卿國子司業少府將作少監京
兆河南太原少尹少詹事左右諭德家令率更令僕
親王長史司馬鳳翔等少尹中州刺史下州刺史大

都督大都護司馬散官正議大夫通議大夫太中大
夫中大夫爵開國伯勲官上輕車都尉

五品班 尚書諸司郎中國子博士都水使者萬年等
六令太常宗正祕書丞著作郎殿中丞尚食尚藥尚
舍尚輦奉御大理正中允左右贊善中舍人洗馬親
王諮議散官中散大夫朝請大夫朝散大夫爵開國
子開國男勲官上騎都尉

武班供奉宣政殿前立位 從北千牛連行立次千牛

中郎將次千牛將軍一人次過狀中郎將一人次接
狀中郎將一人次押柱中郎將一人次又押柱中將
一人次排階中郎將一人次又押散手仗中郎將一
人已上在橫階北次南金吾左右大將軍

入閣升殿 夾階座左右從南千牛將軍一人次千牛
中郎將一人次千牛將軍一人次千牛連行立柱外
過狀中郎將一人接狀中郎將一人次押柱中郎將
一人次又押柱中將一人排階中郎將一人階下押

散手仗中郎將一人金吾將軍分左右立

應當本日入閣人各依前件立其不入閣人各依本職
事立非當上人遇合參日並從本官品第班序其入
閣升殿除千牛衛將軍中郎將外餘並以左右衛中
郎將充其諸衛及率府中郎將不得升殿

一品班 郡王散官驃騎大將軍爵國公

二品班 散官輔國大將軍鎮國大將軍爵開國郡公
開國縣公勲官上柱國柱國

三品班 左右衛左右金吾衛左右驍衛左右武衛左
右威衛左右領軍衛左右監門衛左右千牛衛大將
軍諸衛將軍散官冠軍大將軍雲麾將軍爵開國侯
勲官上護軍護軍

四品班 左右千牛衛左右監門衛中郎將親勲翊衛
中郎將太子左右衛太子左右衛司率清道內率監
門副率太子親勲翊衛中郎將上府折衝都尉中府
折衝都尉散官忠武將軍壯武將軍宣威將軍明威

將軍爵開國伯勲官上輕車都尉輕車都尉

五品班 親勲翊衛郎將太子親勲翊衛郎將親王典
軍親王副典軍下府折衝都尉上府果毅都尉散官
定遠將軍寧遠將軍游騎將軍游擊將軍爵開國子
開國男勲官上騎都尉騎都尉

尚書省官 據周禮先敘六官准六典尚書為百官之
本今每班請以尚書省官為首

東宮官王府官外官 東宮官既為宮臣請在上臺官

之次王府官又次之三太三少賓客右庶子王傅既為師傅賓相不同官屬請仍舊

太常宗正丞並隨寺望合在祕書丞上

尚食奉御尚藥奉御本局既隸殿中省合在殿中丞之下

諸王府官行列合以王長幼為序

檢校官兼官及攝試知判等官並在同類正官之次其有行守檢校兼試攝判等官職事者即依正官班

序除留守副元帥都統節度觀察都團練都防禦使
并大都督大都護持節兼外餘應帶武職事者位在
西班仍各以本官品第為班序

含元殿前龍尾道下序班 舊無此儀唯合於通乾觀
象門南序班自李若水任通事舍人奏更於龍尾道
下序班既非典故今請停

文武官行立班序 通乾觀象門外序班武次文至宣
政門文由東門而入武由西門而入至閤門亦如之

其退朝即並從宣政兩門出

文官充翰林學士皇太子侍讀諸王侍讀武官充禁軍
職事 准舊例並不常朝參其翰林學士大朝會日
准興元元年十二月二十九日敕朝服班序宜准諸
司官知制誥例在集賢史館等諸職事者並請朝參
訖各歸所務

辭見宴集班列先後 請依天寶三載七月二十八日
禮部詳定所奏敕

公式令 諸文武官朝參行立二王後位在諸侯王上

餘各依職事官品為序職事同者以齒致仕官各居
本色之上若職事與散官勲官合班列文散官在當
階職事者之下武散官次之勲官又次之官同者異
姓為後若以爵為班爵同者亦准此其男已上任文
武官者從之文武班若親王嗣王任卑者職事仍依
本班郡王班三品已下職事者在同階品上自外無
文武官者嗣王在太子太保下郡王次之國公在正

三品下郡公在從三品下縣公在正四品下侯在從四品下伯在正五品下子在從五品上男在從五品下即前官被召見及赴朝參致仕者在本品見任上以理解者在同品下其在本司參集者各依職事諸散官三品已上在京者正冬朝會依百官例自餘朝集及別使臨時聽

儀制令 諸在京文武官職事九品已上朔望日朝其文武官五品已上及監察御史員外郎太常博士每

日常參武官五品已上仍每月五日十一日二十一日二十五日參三品已上直諸司及長上者各准職事參其弘文館崇文館及國子監學生每季參若雨霑失容及泥潦並停諸文武九品已上應朔望朝參者十月一日已後二月二十日已前並服袴褶五品已上著珂傘周喪未練大功未葬非供奉及宿衛官皆聽不趨

常參文武官准令每日參自艱難已來人馬劣弱遂許

分日望許依前分日參待戎事稍平加其俸祿即依常
式其武官准令五品已上每月六參三品已上更加三
參頃並停廢今請准令却復舊儀其朔望朝參及弘文
館崇文館國子監學生每季參等請續商量聞奏以前
御史中丞竇等奏伏奉今年四月三日敕宜付所司與
御史臺以近日體例參校禮文務從簡正詳定訖聞奏
者臣等准敕詳定如前敕旨二品武班宜以左右金吾
等十六衛上將軍依次為班首其檢校官無及攝試知

判等本官二品以上者位望崇重禮異羣僚宜依本班
朝會餘依

開延英儀

內中有公事商量即降宣頭付閤門開延英閤門翻宣
申中書并榜正衙門如中書有公事敷奏即宰臣入榜
子奏請開延英祇是宰臣赴對閤門使奏宰臣某已下
延英候對宣徽使殿上宣通次閤門使奏中書門下到
次宣徽使喚次閤門使傳聲喚次通宣舍人引宰臣當

殿立贊兩拜搢笏舞蹈又三拜奏聖躬萬福又兩拜金
口宣上來又兩拜通事舍人引上殿至御座前又兩拜
問聖體皇帝宣安又兩拜三呼萬歲各分班案前立定
兩樞密使在御榻兩面祇候其餘臣僚並約赴外次奏
事訖宣賜茶又兩拜三呼萬歲賜坐喫茶對訖下殿兩
拜宣賜酒食舞蹈謝恩訖宣徽使唱好去就中書喫食
延英畢次兩省官轉對閣門使當殿奏某已下轉對宣
徽使殿上宣通次閣門使奏某已下到次宣徽使喚次

閤門使傳聲喚次通事舍人引當殿立定贊兩拜搢笏
舞蹈又三拜奏聖躬萬福又兩拜殿下奏事訖宣賜酒
食又兩拜舞蹈謝訖閤門使唱好去南班揖殿出於省
就食次對官御史中丞三司使京兆尹並各奏所司公
事次閤門使奏某祇候次對宣徽使殿上宣通次閤門
使奏某到次宣徽使喚次閤門使傳聲喚次通事舍人
引當殿立定贊兩拜搢笏舞蹈三呼萬歲又三拜訖奏
聖躬萬福又兩拜奏所司公事訖宣賜酒食又兩拜舞

蹈謝訖閣門使唱好去南班揖殿出於客省就食合起
延英中謝官文武兩班三品及御史中丞左右丞諸行
侍郎諫議給事中書舍人并諸道節度觀察防禦團練
使刺史兩縣令皆入謝並通喚

文武四品以下及諸道行軍司馬節度副使兩使判官
書記支使推巡令錄等舊例並不對馭中謝祇於正衙
朝謝

後唐同光元年十二月中書門下奏每日常朝百官皆

拜獨兩省官不拜准本朝故事朝退於廊下賜食謂之廊餐百官遂有謝食拜唯兩省官本省有厨不赴廊餐故不拜伏自僖宗幸蜀迴以多事之後遂廢廊餐百官拜儀至今未改將四十載禮恐難停唯兩省官獨尚不拜豈可終日趨朝曾不一拜獨於班列有所異同若言官是近臣於禮尤宜肅謹起今後逐日常朝宣不坐除職事官押班不拜外其兩省官與東西班並齊拜從之天成元年五月十九日敕本朝舊日趨朝官置待漏院

候子城門開便入立班如遇不坐前一日晚便宣來日
兩衙不坐其日纔明閣門立班便宣不坐百官各退歸
司近年以來雖遇不坐正殿或是延英對宰臣或是內
殿親決機務所司不循舊制往往及辰已之時尚未放
班既日色已高人心咸倦今後若遇不坐日未御內殿
前便令閣門使宣不坐放朝班退

五月詔每月朔望日賜百官廊下餐

唐室升平日常參官每日朝退賜食謂之廊餐自乾

符亂離之後祇遇月旦入閣日賜食上初即位命百官五日一起居李琪以為非故事請罷之唯每月朔望日入閣賜食至是宣旨朔望入閣外依舊五日一起居遂為定式

五代史李琪傳曰唐末喪亂朝廷之禮壞天子未嘗視朝而入閣之制亦廢常參之官日至正衙者傳聞不坐即退獨大臣奏事日一見便殿而侍從內諸司日再朝而已明宗初即位乃詔羣臣五日一隨宰相

入見內殿謂之起居琪以為非唐故事請罷五日起
居而復朔望入閣明宗曰五日起居吾思所以數見
羣臣也不可罷而朔望入閣可復然唐故事天子日
御殿見羣臣日常參朔望薦食諸陵寢有思慕之心
不能臨前殿則御便殿見羣臣曰入閣宣政前殿也
謂之衙衙有仗紫宸便殿也謂之閣其不御前殿而
御紫宸也乃自正衙喚仗由閣門而入閣官俟朝於
衙者因隨以入見故謂之入閣然衙朝也其禮尊閣

宴見也其事殺自乾符已後因亂禮闕天子不能日見羣臣而見朔望故正衙常日廢仗而朔望入閣有仗其後習見遂以入閣為重至出御前殿猶謂之入閣其後亦廢至是而復然有司不能講正其事凡羣臣五日一入見中興殿便殿也此入閣之遺制而謂之起居朔望一出御文明殿前殿也反謂之入閣琪皆不能正也琪又建言入閣有待制次對官論事而內殿起居一見而退欲有言者無由自陳非所以數

見羣臣之意也明宗乃詔起居日有言事者許出行
自陳又詔百官以次轉對

三年中書門下奏逐日常朝宣奉敕不坐兩省官與東
西兩班並拜押班宰臣不拜或聞班行所論承前有廊
餐百官謝食兩省即各有常厨從來不拜或云有侍臣
不拜檢尋故實不見明規百官拜為廊餐即承旨合宣
有敕賜食供奉官不拜亦恐非儀且左右前後之臣日
面天顏豈可不拜臣等商量今後常朝押班宰臣亦拜

通事舍人亦拜閤門外放仗亦拜從之

晉開運元年十一月尚書吏部侍郎張昭遠奏文武常
參官日於正衙立班閤門使宣不坐後百僚俱拜舊制
唯押班宰相押樓御史通事舍人各緣提舉贊揚所以
不隨庶官俱拜自唐天成末議者不悉朝儀遽違舊典
遂令押班之職一例折腰此則深忽禮文殊乖故實且
宰相居庶僚之首御史持百職之綱嚴肅禁庭糾繩班
列慮於拜揖之際或爽進退之宜於是凝立靜觀檢其

去就若令旅拜旅揖實恐非儀況事要酌中恭須近禮
人臣愛主不在於斯其通事舍人職司贊導比者兩班
進退贊相其宜今則在文班武班之前居一品二品之
上押笏齊拜禮實未聞其押班宰相押樓御史通事舍
人並請依天成三年已前禮例施行殿中侍御史賈元
珪奏除押樓御史通事舍人請依張昭遠奏其宰臣押
班請依舊設拜從之

石林葉氏曰唐以宣政殿為前殿謂之正衙即古

之內朝也以紫宸殿為便殿謂之上閣即古之燕朝也而外別有含元殿古者天子三朝外朝內朝燕朝外朝在王宮庫門外有非常之事以詢萬民於宮中內朝在路門外燕朝在路門內蓋內朝以見羣臣或謂之路朝燕朝以聽政猶今之奏事或謂之燕寢鄭氏小宗伯注以漢司徒府有天子以下大會殿為周之外朝而蕭何造未央宮言前殿則宜有後殿大會殿設於司徒府則為外朝而宮

中有前後則為內朝燕朝蓋去周猶未遠也唐含
元殿宜如漢之大會殿宣政紫宸乃前後殿其沿
習有自來矣方其盛時宣政蓋常朝日見羣臣遇
朔望陵寢薦食然後御紫宸旋傳宣喚仗入閣宰
相押之由閣門進百官隨之入謂之喚仗入閣紫
宸殿言閣猶古之言寢此御朝之常制也中世亂
離宣政不復御正衙立仗之禮遂廢惟以隻日常
朝御紫宸而不設仗敬宗始復修之因以朔望陳

伏紫宸以為盛禮亦謂之入閣誤矣

又曰唐正衙日見羣臣百官皆在謂之常參喚仗入閣百官亦隨以入則唐制天子未嘗不日見百官也其後不御正衙紫宸所見惟大臣及內諸司百官俟朝於正衙者傳聞不坐即退則百官無復見天子矣敬宗再舉入閣禮之後百官復存朔望兩朝至五代又廢故後唐明宗始詔羣臣每五日一隨宰相入見謂之起居時李琪為中丞以為非

禮請復朔望入閣之禮明宗曰五日起居吾思見羣臣不可罷朔望入閣可復遂以五日羣臣一入見中興便殿為起居朔望天子一出御文明前殿為入閣訖於宋朝不改元豐官制行始詔侍從官而上日朝垂拱謂之常參官百司朝官以上每五日一朝紫宸為六參官在京朝官以上朔望一朝紫宸為朔參官遂為定制

宋朝因唐與五代之制文武官每日赴文明殿正衙常

參宰相一人押班五日起居即崇德長春二殿中書門下為班首其長春殿常朝則內侍省都知押班率內供奉官以下并寄班等先起居次閣門使次三班使臣度節

觀察防禦團練刺史等子弟充供奉官侍禁殿直有旨令預內朝起居者次內殿當直諸班

殿前指揮使左右班都虞候以下內殿直散直散指揮散都頭金槍班等次長入祗候東西

班殿侍次御前忠佐次殿前都指揮使率軍校至副指

揮使次駙馬都尉

任刺史以上者綴本班

次諸王府僚次殿前司

諸軍使都頭次皇親將軍以下至殿直次行門指揮使

率行門起居

以上並內侍贊謂

如傳宣前殿不坐即宰相與樞

密使文明殿學士三司使翰林樞密直學士中書舍人

三司副使知起居注皇城內監庫藏朝官諸司使副內

殿崇班供奉官侍禁殿直翰林醫官待詔等同班入

中書

舍人乾德後始令赴內朝三司判官太平興國前赴內殿其後罷之止隨百官五日起居中書舍人知起居注遇五日起居之次親王次侍衛親軍馬步軍都指揮使

時亦各赴外朝

率軍校至副指揮使次使相次節度使次統軍次兩使

留後觀察使次防禦團練使刺史次侍衛馬軍步軍使

都頭起居畢見謝班入如御崇德殿即樞密使以下先

就班俟升坐

諸司使副以下至殿直分東西對立餘皆北向長春殿皆北向

宰相參知

政事最後入

以上並閣門贊謁

日止再拜朔望及三日假即樞

密使以下皆舞蹈國初近侍執事之臣皆赴晚朝後罷

之凡早朝宰相樞密宣徽使起居畢同升殿問聖體宰

相奏事樞密宣徽使退候宰相對畢樞密使復入奏事

次三司開封府審刑院

遇百官起居即樞密宣徽使侍立俟左右巡使出即退其崇德

殿三司使文明樞密直學士內客省使仍侍立舊三司使奏事副使判官同對其後止副使司之大中祥符九

年詔自今有大事許判官同上之

及羣臣以次升殿

自兩省以上領務京師者有公事許

即請對自餘受使出入要切者欲面議奏事則先聽進止

其見謝辭官以次入於庭

出使閑慢及未升朝官或止拜於殿門外自祕書監上將軍觀察使內客省使以上得拜殿前階上及升殿止拜御座前餘凡見者先之謝次之辭又次之

其班次先宰相次親

王次樞密副使參知政事次內職內臣次使三司學士兩省御史臺文武班節使以下次將軍校次雜班惟

宰相親王使相赴崇德殿即宣徽使通喚餘皆側立候

通再拜舞蹈致詞辭即不舞蹈見即將相升殿問聖體

其賜分物酒食及收進奉物皆舞蹈稱謝

凡收進奉物皆入謝

幕

職州縣官謝辭即判銓官引對兼於殿門外宣辭戒勵
凡國有大慶瑞出師勝捷樞密使率內職軍校入賀致
詞閣門使宣答訖當侍立者升殿次百官入宰相致詞
宣徽使宣答賜酒即預坐官後入作樂送酒如曲宴之
儀

凡視朝退進食訖易服御崇政殿或承明殿先羣臣

告謝

自諫舍知雜御史以上及帶三司館王府僚屬
歷官醫官刺史以上上將軍并發運使轉運使

并許焉自非宣制並捧官告敕叙謝其貴近者或
賜坐賜茶餘或改章服即謝訖易服又告謝再拜次

軍頭引見司奏事於殿陛下三班審官院流內銓

刑部及諸司引見官吏

後詔審官院引對京朝官奏課不得過三人差遣不得過

五人三使部選人差遣各不得過十人

如假期起居辭見畢即移御坐

臨軒視事既退復有羣司奏或閱器物之式謂之後

殿再坐

御賜宴之儀宋朝常以春秋之季仲月及誕聖節擇日

大宴羣臣於廣德殿有司預於殿庭設山樓排塲為羣

仙隊仗六番進貢九龍五鳳之狀司天鷄唱樓於側殿

上陳錦綉幃帟垂香毬設銀香爐於楹內藉以文茵御
設茶酒器於殿東北楹間羣官醵斚於殿下幕屋分設
宰相使相三師三公參知政事東宮三師僕射學士大
夫中丞三少尚書常侍賓客太常宗正卿丞郎給事諫
舍節度兩使留後觀察防禦團練刺史上將軍統軍廂
都指揮使坐於殿上文武四品以上知雜御史郎中郎
將禁軍都虞候坐於殿樓餘升朝官諸軍副都頭以上
諸蕃進奉使諸道進奉將軍以上分坐於兩廊宰相使

相坐以綉整

曲宴行
幸用凡

參知政事以下用二蒲整花球

曲宴

樞密副
使並同

軍都指揮以上用一蒲整自承樓而下皆緋緣

氈條席殿上器用以金餘以銀其日樞密使以下先起

居訖當侍立者升殿宰相率百官入宣徽門通喚致詞

訖宰相升殿進酒各就坐酒九行

曲宴酒七行
或至五行

每上舉

酒羣臣立侍次宰相次百官舉酒或傳旨命醕即皆搯

笏起飲再拜

曲宴多
令不拜

或上壽朝會止令滿酌不勸中飲

更衣賜花有差宴訖舞蹈拜謝而出其郊祀籍田禮畢

皆設大宴上元觀燈設燈山靈臺音樂百戲於明德門
前召三公僕射尚書丞郎東宮三師三少賓客太常宗
正卿大兩省御史大夫中丞知雜御史中元下元升東
華門唯近臣預焉苑囿池御及觀稼校獵遊幸所至但
宴從官太平興國以後大宴於大明殿親王樞密使副
宣徽三司使駙馬都尉皆侍立軍校自龍神衛四廂都
指揮使立庭其宴契丹使亦於崇政殿但近臣及刺史
郎中而上預焉巡幸還京亦設大宴於崇德殿雍熙三

年後常以暮春召近臣賞花釣魚於苑中三館之職皆

預中書樞密院節度使出使赴鎮宰相還朝咸賜宴於

外苑以親王或樞密宣徽使主其席

掌兵觀察以上有特賜者皆開封府

樂營支應又別賜酒果細食餅餌

中書樞密院節度使見辭日長春殿

賜酒五行見仍設食當直翰林學士以上皇親觀察以

上預坐

太祖太宗朝藩鎮沿五代舊制時或來朝自後非詔命不得擅離治所

牧伯入覲

及被召使迴客省齋籤賜酒食節度使十日留後七日

觀察使五日留後三日觀察使一日防禦團練使刺史

並賜生料節度使以私故到闕下及步軍都虞候以上

出使廻者亦賜酒食熟羊羣官出使廻朝見日面賜酒

食

中書樞密宣徽使伴學士東宮三師僕射刺史大夫節度使內客省使並宣徽使伴兩省五品以上待制

中丞三司副使東宮三少尚書丞郎卿監上將軍統軍留後觀察防禦團練使刺史宣慶宣政昭宣使並客省使伴少卿監大諸將軍司使以下任發運轉運提點刑獄知州通判縣令都監巡檢廻者朝見並通事舍人伴客省引進四方館問羣臣稱賀賜衣奉尉並特賜茶酒

或賜食外任遣人進奉亦賜酒食或生料十一月一日

後盡正月每五日起居百官皆賜茶酒諸軍小校三日

一賜冬正二社重陽寒食樞宰近臣禁軍大校或賜宴
其第及府署中率以為常淳化四年令京官兼館職者
並預大宴

先是輔臣宴集於尚書省或都亭驛誕聖節齋會則
就相國寺大中祥符間上以佛舍中烹飪優笑有虧
恭潔乃令內侍臣度館宇顯敞者易之遂以南衙為
錫慶院以備宴令焉

大祖皇帝建隆二年春正月朔帝御崇元殿受朝賀服

袞冕設宮懸仗衛如儀仗退羣臣詣皇太后宮門奉賀
上常服御廣德殿羣臣上壽用教坊樂

宋承前代之制以元日五月朔冬至行大朝會之禮
太祖建隆元年五月朔有司請受朝時司天上言日
當食故罷是年十一月冬至上親征揚州不受朝宰
臣率百官詣行宮拜表稱賀至二年正月朔始行其
禮自是凡正冬及五月朔皆太常禮院奏請其無事
而罷會者下敕但云不御殿至日宰臣文武百官詣

閣門拜表稱賀五月朔亦無拜表之禮

宋因唐開元之制每正冬不受朝及邦國大慶瑞奉
上尊號則宰相率文武羣臣并諸軍校蕃夷酋長道
釋耆老等詣東上閣門拜表進表官跪授表於宰相
宰相又跪授閣門使乃以奉御凡有答詔亦拜受於
閣門獲可奏者奉表稱謝其正冬樞密使率內職廷
臣拜表於長春殿門外亦閣門使受之西京留守率
留守百官正日一上表起居質明並集長壽寺之班

置表於案再拜以遣其春秋賜及國大慶瑞並同之
御殿儀仗及宮中導從之制

御殿儀仗者本充庭之制唐禮殿庭中門皆列諸衛黃
麾大仗宋朝太祖增創錯鏞諸旗并旛麾等著於通禮
正至五月一日御正殿則陳之青龍白虎旗各一人分
左右 五岳旗五在左 五星旗五在右 五方龍旗
二十五在左 五方鳳旗二十五在右 紅門神旗二
十八分左右 朱雀元武旗各一分左右 皂纛十二

分左右

以上金吾

天一泰一旗各一分左右

攝提旗二

分左右

五神旗五

木火在左金水土在右

北斗旗一在左

二十八宿旗各一

角宿至壁宿在左奎宿至軫宿在右

風伯雨師旗各

一分左右

白澤馴象仙鹿玉兔馴犀金鸚鵡瑞麥孔

雀野馬犂牛旗各二分左右

日月合璧旗一在左

五星連珠旗一在右

雷公電母旗各一分左右 軍

分旗六分左右

黃鹿飛麟兕騶牙白狼蒼烏辟邪網

子魄旗各二分左右

信播二十二分左右 傳教告

止幡各十二分左右 黃麾二分

以上兵部

日旗月

旗各一分左右 君王萬歲旗一在左 天下太平旗

一在右 獅子旗二分左右 金鸞金鳳旗各一分左

右 五方龍旗各一

青赤在左 黃白黑在右 以上龍犀

龍君虎君旗

五分左右 赤豹黃熊旗各五分左右 小黃龍旗一

在左 天馬旗一在右 吏兵力士旗各五分左右

天王旗四分左右 太歲旗十二分左右 天馬旗六

分左右 排闥旗六十分左右 左右幡斄各五行行

七十五 大黃龍旗二分左右 大神旗六分左右

以上

六軍

宮中導從之制唐以前無聞焉五代漢乾祐中始置主
輦十六人 捧足一人 掌扇四人 持踏床一人並
服文綾袍 銀葉弓脚幞頭尚宮一人 寶省一人

高鬟紫衣書省二人 紫衣弓脚幞頭新婦二人 高

鬟青袍大將二人 紫衣弓脚幞頭童子執紅絲拂二

人 高鬟髻青衣執犀盤二人 帶髯頭黃衫執翟尾

二人 帶鬚頭黃衫雞冠二人 紫衣執香爐香盤分

左右以次奉引宋太平興國初增主輦二十四人改服
高脚幞頭一輦頭一人衣紫綉袍持金塗銀杖以督領
之捧真珠七寶翠毛華樹二人衣緋袍捧金寶山二人
衣綠繡袍捧龍腦盃二人衣緋銷金袍並高脚幞頭執
拂翟四人鬚頭衣黃繡袍舊衣綾袍紫衣者悉易以銷
金及繡復增司簿一人內省一人司儀一人司給一人
皆分左右前導凡一十七行每冬正御殿祀郊廟步輦

出入至長春殿即用之其乘輦則屈右足垂左足而憑几蓋唐制也真宗時又加四面內官周衛

八月朔上御崇元殿行入閣儀置待制候對官賜廊下食

入閣唐制起於天寶明皇以無為守成詔宴朝喚仗百官從容至閣門入蓋唐前舍元殿非正至大朝會不御次宣政殿謂之正衙每坐朝必立仗於正衙或御紫宸殿即喚正衙仗自宣政殿兩門入是謂東西

上閣門故謂之入閣其後遂為常朝之儀自五代以來既廢正衙立仗而入閣亦希閣不講至是復行之然御前殿非唐舊制矣崇元殿即大慶殿前殿也待制候對者亦唐制也每正衙置待制官兩員正衙退後又令六品以下官於延英候對皆所以備顧問其後每入閣即有待制次對官後唐天成中廢至是復行之廊下食起唐貞觀其後常參官每日朝退賜食謂之廊餐唐末浸廢但於入閣起居日賜食今循其

制

三年三月詔內殿起居日令百官以次轉對限三人為定其封章於閣門通進復鞠躬自奏宣徽使承旨宣答拜舞而出

乾德三年冬至受朝賀於文明殿皆服通天冠絳紗袍設宮懸仗衛如元會

四年冬至朝元殿受朝畢常服御大明殿羣臣上壽始用雅樂登歌二舞羣臣酒五行而罷每行酒太官令奏

巡周饋食稱食徧

六年九月始以旬假日御講武殿近臣但赴早參

宰相以下

皆具靴笏諸司使以下悉係鞵

其節假及太祠並如令式處分

開寶九年旬休日不視事太宗即位旬休日復視事

講武殿其後又詔自今內外百司除舊制給假外每

月旬假上巳社重午重陽並休務一日三司開封府

事關急速不在此限遇初寒盛暑大雨雷雪當議放

朝

太宗淳化三年正月朔服袞冕御朝元殿受朝賀禮畢改通天冠絳紗袍升座受羣臣等上壽

帝即位以來每朝賀畢退御大明殿常服上壽奏教坊樂至是始命有司約開元禮定上壽儀皆以法服行禮設宮懸萬舞酒三行而罷復舊制也又取嗣位以來祥瑞作祥麟丹鳳白龜河清瑞麥五曲用之

是歲令有司復舉十五條一朝堂行私禮二跪拜三待漏行立失序四談笑喧譁五入正衙門執笏不端六行

立遲緩七至班列行立不正八趨拜失儀九言語微喧
十穿班仗十一閤門不即就班十二無故離位十三廊
下食行坐失儀語喧十四不從正衙門出入十五非公
事入中書犯者罰一月俸有司振舉拒不伏者錄奏乞
行貶降其後每罰減半

仁宗天聖四年帝詔輔臣曰朕欲元日率百官先上太
后壽然後御天安殿可令禮院草具其儀太后曰豈可
為吾故後元會禮哉宰相王曾因言陛下以孝奉母儀

太后以謙全國體請如太后命不聽詔中書門下具儀
注

正月壬寅朔曉漏未盡三刻百官常服與契丹使班
會慶殿廷內侍請皇太后出殿後幄鳴鞭升座又自
殿後皇帝幄贊引皇帝服靴袍於簾內皇太后北向
褥位再拜跪稱臣名言元正啓祚萬物惟新伏惟尊
號皇太后陛下膺時納祐與天同休內常侍承旨答
曰履新之祐與皇帝同之帝再拜詣皇太后御座稍


東內給事酌御酒盞授內謁者監進皇帝執盞盤前
跪進訖以盤興內謁者監承接皇帝却就褥位跪奏
曰臣名稽首言元正令節不勝大慶謹上千萬歲壽
再拜內常侍宣答曰恭舉皇帝壽酒皇帝再拜執盤
侍立教坊樂止皇帝受虛盞還幄通事舍人引百官
橫行典儀贊再拜舞蹈起居太尉升自西階稱賀簾
外降還位皆再拜舞蹈侍中承旨曰有制皆再拜宣
曰履新之吉與公等同之再拜舞蹈閣門使簾外奏

宰臣某以下進壽酒皆再拜太尉升自東階翰林使酌御酒盞授太尉執盞盤跪進簾外內謁者監跪接以進太尉跪奏曰元正令節臣等不勝慶忭謹上千萬歲壽降還位皆再拜宣徽使承旨曰舉公等觴皆再拜分班序立太尉升立簾外樂止內謁者監出簾授虛盞太尉降階橫行皆再拜舞蹈宣徽使承旨宣羣臣升殿再拜乃升及東西廂坐酒三行侍中奏禮畢樞密使已下迎乘輿於長春殿起止稱賀百官就

朝堂易朝服班天安殿皇帝衮冕受朝禮官通事舍
人引中書令門下侍郎各於案取所奏文詣褥位脫
劔舄以次升分東西立諸方鎮表祥瑞案並先置殿
門外左右令史絳衣對舉給事押祥瑞中書侍郎押
表案入分詣東西階下對立既賀更服承天冠絳紗
袍稱觴上壽止舉四爵乘輿還內恭謝太后如常禮
英宗治平四年詔御史臺每遇起居日令百僚轉對御
史臺請依閤門儀制諭兩省及文班秩高者二員於百

官起居日轉對若兩省官有充學士待制則綴樞密班起居內朝臣僚不與詔從之又詔遇轉對日增二員

文獻通考卷一百七



總校官庶吉士臣張能照

校對官檢討臣盧應

膳錄監生臣許溶

欽定四庫全書叢要

史部

文獻通考卷一百

八

詳校官員外郎臣潘紹觀



欽定四庫全書薈要卷九千四百二十八

史部

文獻通考卷一百八

鄱陽馬端臨貴與著

禮考三

朝儀

神宗初即位御史中丞王陶奏劾宰相韓琦不押常朝
班陶坐黜知陳州

陶疏略曰忽千官瞻視之庭蔑如房闥艱再拜表儀

之禮重若丘山琦與曾公亮皆待罪故事朝廷以宰相日奏事垂拱退詣文德殿押常朝班或已過辰正緣中書聚廳見客有急速公事商量若必須輪宰臣赴文德殿押班必於常朝事務大有妨滯故御史臺放班行之數十年非始於琦等陶以論事不行疑琦沮之故以此劾琦上不直陶黜之

熙寧元年詔自今授外任者許令轉訖朝辭

二年監察御史裏行張戢程顥言每欲奏事必俟朝旨

或朝政有闕及聞外事而機速後時則已無所及況往復待報必由中書萬一事干政府則或致沮格請依諫官例牒閣門求對或有急奏即許越次登對庶幾遇事入告毋憂失時詔依所請

三年知制誥宋敏求等言文德殿入閣儀制考之國朝會要與今儀制所載頗或異同按今文德殿唐宣政殿也紫宸殿唐紫宸殿也然祖宗朝皆嘗御文德殿入閣唐制常設仗衛於宣政殿或遇上坐紫宸即喚仗入閣

如此則當御紫宸殿入閣方協舊制請下兩制及太常
禮院詳定詔學士院議翰林學士承旨王珪等言按入
閣者乃唐隻日紫宸殿受常朝之儀也唐宣政殿即今
文德殿唐紫宸殿今紫宸殿也唐制天子坐朝必立仗
於正衙若止御紫宸即喚正衙仗自宣政殿東西閣門
入故為入閣五代以來遂廢正衙立仗之制今閣門所
載入閣儀者止是唐常朝之儀非為盛禮不可遵行從
之自是入閣之禮遂罷之敏求又言本朝以來惟入閣

乃御文德殿視朝今既不用入閣儀即文德殿遂闕視朝之禮請下兩制及太常禮院約唐制御宣政殿裁定朔望御殿儀以備正衙視朝之制詔學士院詳定儀注學士韓維等以入閣圖增損裁定上儀曰朔日不值假前五日閣門關諸司排辦前一日有司供帳於文德殿其日左右金吾將軍常押本衛仗判殿中省官押細仗先入殿庭東西對列文武官等分東西序立諸軍將校分入北向立朝堂引贊官引彈奏御史二

員入殿門踏道當下殿北向立次催文武班分入並

東西相向對立諸軍將校即於殿庭北向立班

其班次並

御史臺祇應

皇帝服靴袍垂拱殿坐鳴鞭內侍閣門管軍

依朔望常例起居次引樞密宣徽使三司使副樞密

直學士內客省使以下至醫官待詔及修起居注官

二員並大起居皇帝乘輦至文德殿後閣門奏班齊

皇帝自後閣出殿上索扇升榻鳴鞭扇開簾捲儀鸞

使焚香喝文武官就位四拜起居雞人唱時舍人於

彈奏御史班前西向喝大起居御史由文武班後至

對立位次引左右金吾將軍合班於宣制石南大起

居班首出班躬奏軍國內外平安歸位再拜各歸東

西押仗位通喝舍人於宣制石南北向對立舍人退

於西階次揖宰臣親王以下躬奏文武百僚宰臣某

姓名以下起居分引宰臣以下橫行諸軍將校仍舊

立閣門使喝大起居舍人引宰臣至儀石北俛伏跪

致詞祝曰訖

其詞曰文武百僚宰臣全銜臣某姓名等言孟春之吉伏惟皇帝陛下膺受時

社與天無窮臣等無任歡呼忭蹈之至

歸位五拜閤門使揖中書由東

階升殿樞密使帶平章事以上由西階升殿侍立

並依

圖

給事中一員

以知門下封駁事官充

歸左省位立轉對立於

給事中之南

如罷轉對官每遇御史臺前期牒請文官二員並依轉對官例先於閤門投進

狀

吏部侍郎及刑法官立於轉對官之南兵部侍郎

於右省班南與吏部侍郎東西相向立定搢笏各出

班籍置笏上

吏部兵部侍郎以知審官東西院官充刑法官以知審刑大理寺官充

親

王使相以下分班出引轉對官於宣制石南宣徽使

殿上承旨宣荅如儀次吏部兵部侍郎及刑法官對

揖出

見謝辭班
自從別儀

次彈奏御史無彈奏對揖出

如有彈
奏並如

儀

引給事中至宣制石南揖躬奏殿中無事喝祇候

揖西出次引修起居注官次立排立供奉官以下各

合班於宣制石南躬喝祇候揖分班出喝文武官等

門外祇候出索扇垂簾皇帝降座鳴鞭舍人當殿承

旨放仗四色官蔽韉急趨至宣制石南稱奉勅放仗

金吾將軍并判殿中省官對拜訖隨仗出親王使相

節度使至刺史學士臺省官文武百僚諸軍將校等並序班朝堂謝賜茶酒皇帝御垂拱殿座中書樞密及請對官奏事不引見謝辭班後殿座臨時取旨其日遇有德音制書御札仍候退御垂拱殿座制箱出外應正衙見謝辭文武臣僚並依御史臺儀制喚班依序分入於文武班後以北為首分東西相向重行異位依見謝辭班序位餘押班臣僚於班稍前押班候刑法官對揖出分引近前揖躬舍人當殿宣班引

轉對班見謝辭並如紫宸殿儀樞密使不帶平章事

叅知政事至同簽書樞密院事宣徽使並立於宣制

石稍北宰臣親王樞密帶平章事使相繫押班者立

於儀石南

餘官並立於宣制石南並合贊喝闕門使

引並如儀贊喝訖係

中書樞密並揖升殿謝辭揖西出其合問聖體者並

如儀餘官分班出

彈奏御史候見謝辭班絕對揖出其朝見如謝都城門外御筵及詔

赴闕謝茶藥撫問之類不可合班者各依別班中謝對賜酒食等並門賜其係正衙見門謝辭亦門外喝

放

應正衙見謝辭臣僚前一日於閣門投詣正衙勝

子閣門下奏目又投正衙狀於御史臺四方館應朔
日或得旨罷文德殿視朝止御紫宸殿起居其已上
奏目正衙見謝辭班並放免依官品隨赴紫宸殿引
或值改依常朝文德殿自有百官班日並如舊儀應
外國蕃客見辭候喚班先引赴殿庭東邊依本國職
次重行異位立候見謝辭班絕西向躬舍人當殿通
班轉於宣制石南北向立贊喝如儀西出其酒食分
物並門賜如有進奉候彈奏御史出入進奉入

惟御
馬及

擔床自殿西偏門入東偏門出其進奉出入文武官起居舍人通某國進奉宣徽使喝進奉出節次如紫

宸殿儀式候進奉出給事中奏殿中無事出其後殿再坐

合引出者從別儀其日賜茶酒宰臣樞密於閣子親

王於本廳使相宣徽使觀文殿大學士至寶文閣直

學士兩省官待制三司副使文武百官皇親使相以

下至率府副率及四廂都指揮使以下至副都頭並

於朝堂

如朝堂位次不足即於朝堂門外序次

管軍節度使至四廂都

指揮使節度使兩使留後至刺史並於客省廳詔依

所定

合班圖
載卷末

元豐元年詔右諫議大夫宋敏求權御史中丞蔡確樞密副使承旨張誠一直舍院同判太常寺李清臣詳定正旦御殿儀注敏求等遂上朝會儀二篇令式四十卷詔頒行

元正冬至大朝會儀注

前期有司設御座於大慶殿東西房於御座之左右少北東西閣於殿後百官宗室客使次於朝堂之內外五

輅先陳於庭兵部設黃麾伏於殿之內外太樂令展宮
架之樂於橫街南鼓吹令分置十二案於宮架外協律
郎二人一位於殿上西階之前楹一位於宮架西北俱
東向陳輿輦御馬於龍墀繖扇於沙墀貢物於宮架之
南東西相向餘則列於大慶門之外

冬至不設貢物

扶侍執事

侍立官及諸司使副立於左右樞密院諸房副承旨承
制以下立於殿下東西相向重行異位北上典儀設三
師三公侍中中書令左右僕射開府儀同三司位於丹

墀香案之南少東次尚書左丞位於其後皆面北西上

親王位於香案之南少西北面東上

上壽則知同知樞密院事位於親王

之後門下侍郎位於其東次左散騎常侍次給事中左諫

議大夫次左司諫正言皆重行位於其後觀文資政殿

大學士學士端明殿學士位於次南並西南北上中書

侍郎位於其西次右散騎常侍次中書舍人右諫議大

夫次右司諫正言皆重行位於其後翰林學士承旨至

寶文閣學士位於次南次樞密直學士以下次待制皆

重行位於其後並東面北上起居郎舍人夾香案東西相向契丹使位於龍墀上少西北面東上宗姓節度使以下至率府副率位於橫街南分東西相對班各重行異位北上左右巡使位於次南東西相向宮架前少東則特進以下至未升朝官班各重行異位北面西上夏國使在宮架之東軍員位於其後夏國人從次之宮架前少西則御史臺班節度以下又位於西並重行北面東上皆視特進退一列外高麗國使在宮架之西軍員

位於其後高麗人從次之諸蕃客位於次西陪位進奏
官位於宮架之南諸道貢舉解首位於其後皆北面而
設叙班位於大慶門外東西相對以北為上中書侍郎
諸方鎮表案於右給事中祥瑞案於左

冬至不設給事中
位祥瑞案下

同其日闕大慶門列黃麾仗張旗幟羣官宗室使各服
其服以俟太樂令帥樂工入太常卿立於宮架前協律
郎就舉麾位中書侍郎以諸方鎮表給事中以祥瑞案
令令史對舉侍衛官各就列輦出至西閣降輦符寶郎

奉寶俱詣閣奉迎有司引祕書監以下次御史知雜以下次宗姓及外任防禦使以下就位侍中版奏中嚴復位少頃奏外辦閣簾捲殿上鳴蹕太樂令令撞黃鍾之鐘右五鐘皆應內侍承旨索扇扇合皇帝服通天冠絳紗袍御輿出西閣協律郎俛伏舉麾興奏乾安之樂鼓吹振作皇帝出自西房降輿即御座南向扇開殿下鳴蹕協律郎偃麾戛敔樂止鑪烟升符寶郎奉寶置御座前尚書左右丞以上門下中書省官及待制以上至大

學士正議大夫以上御史中丞以上宗姓及外正任觀

察使以上契丹使班分東西各以次入奏正安之樂就

位樂止中書侍郎押表案入詣西階下東向立給事中

押祥瑞案入詣東階下西向立押樂官歸本班起居畢

復案位三師以下至尚書左右丞親王以下至百官及

御史臺官外正任契丹使俱就北向位贊者曰拜在位

者皆再拜舞蹈三稱萬歲再拜訖又再拜太尉將升中

書令門下侍郎俱降至兩階下立

冬至門下侍郎不奏下同

太尉詣

西階下行則樂作至位樂止升階中書令門下侍郎各
於案取所奏以次升中書令取方鎮官最高一表分東
西立太尉詣御座前北向俛伏跪奏文武百僚太尉具
官臣某等言元正起祚萬物咸新

冬至云晷運推移日南長至

伏惟

皇帝陛下膺乾納祐與天同休俛伏興降階侍中詣東
階升殿立俟太尉還位贊者曰拜在位者皆再拜舞蹈
三稱萬歲再拜引侍中進當御座前承旨退臨階西向
稱有制贊者曰拜在位皆再拜宣曰履新之慶

冬至云履長之

慶

與公等同之贊者曰拜在位者皆再拜舞蹈三稱萬

歲再拜侍中少退引北向班各分東西序立中書令進
當御座前北向俛伏跪奏中書令具官臣某奏諸方鎮
表摺笏讀訖執笏俛伏興少退東向立門下侍郎詣御
座前奏祥瑞如諸方鎮表儀奏畢置所奏於案南中書
侍郎給事中俱還本班案退戶部尚書詣橫街南承制
位俛伏跪奏具官某言諸州貢物請付所司俛伏興侍
中前承旨退西向曰制可侍中少退舍人曰拜戶部尚

書再拜還本班次引禮部尚書就位俛伏跪奏具官臣
某言諸蕃貢物請付所司俛伏興侍中前承旨退西向

曰制可侍中少退舍人曰拜禮部尚書再拜還本班

冬至

不奏祥瑞貢物

太史令就位俛伏跪奏具官臣某年某月日雲

物祥瑞請付史館俛伏興侍中前承旨退西向曰制可
侍中少退舍人曰拜太史令再拜還本班侍中進當御
座前俛伏跪奏侍中具官臣某言禮畢俛伏興還位內
侍承旨索扇扇合殿下鳴蹕太樂令令撞蕤賓之鐘左

五鐘皆應協律郎跪俛伏舉麾興太樂令令奏乾安之
樂鼓吹振作皇帝降座御輿入自東房還東閣扇開偃
麾戛敔樂止侍中奏解嚴百官退還次有司設食案太
樂令設登歌於殿上二舞入架於架南預坐當升殿者
位於御座之前文武相向異位重行以北為上非升殿
者位於東西廊下尚食奉御設壽奠於殿上之東楹少
南南向設站於尊南加爵一

尊奠酒爵以
金玉器充

有司設上下

羣官酒尊於殿下東西廂侍衛官及執事者各立於其

位百官入就位侍中版奏中嚴復位少頃奏外辦閣簾
捲殿上鳴蹕太樂令令撞黃鍾之鐘右五鐘皆應內侍
承旨索扇扇合皇帝服通天冠絳紗袍御輿出東閣協
律郎俛伏舉麾興奏乾安之樂鼓吹振作皇帝出自東
房降輿即御座南向扇開殿下鳴蹕協律郎偃麾戛敔
樂止爐烟升三師以下至尚書左右丞親王以下至同
知樞密院事及百官御史臺官外正任契丹使俱就北
向位贊者曰拜在位者皆再拜三稱萬歲北向班分東

西立光祿卿詣橫街南北向俛伏跪奏具官臣某言請
允羣臣上壽俛伏興侍中詣東階升進御座前承旨臨
退階西向曰制可侍中少退舍人曰拜光祿卿再拜訖
復位三師以下就北向位贊者曰拜在位者皆再拜三
稱萬歲太尉自東階升詣酒尊所北向尚食奉御酌酒
一爵授太尉太尉搢笏執爵詣御座前跪進皇帝執爵
太尉執笏俛伏興少退當御座前俛伏跪奏文武百官
太尉具官臣某等稽首言元正首祚

冬至云天
正長至

臣等不

勝大慶謹上千萬歲壽俛伏興退降階復位贊者曰拜
在位者皆再拜三稱萬歲侍中承旨退臨階西向宣曰
舉公等觴贊者曰拜在位者皆再拜三稱萬歲北向班
分東西序位太尉自東階升侍立皇帝舉第一爵作和
安之樂飲訖樂止太尉受虛爵復於坳降階三師以下
復北向位贊者曰拜在位皆再拜舞蹈三稱萬歲又再
拜侍中自東階升進御座前俛伏跪奏侍中具官臣某
言請延公王等升殿俛伏興降階復位侍中承旨退稱

有制贊者曰拜在位者皆再拜宣曰延公王等升殿贊者曰拜在位者皆再拜舞蹈三稱萬歲再拜公王等詣東西階升於席後立尚食奉御進酒殿中監省酒以進皇帝第二爵升殿羣官就橫行位舍人曰各賜酒贊者曰拜上下羣官皆再拜三稱萬歲舍人曰就坐太官令行酒羣官搢笏受觶作正安之樂文舞入立宮架北觴行一周太官奏樂止尚食奉御進食置御座前又詔羣官食太官令奏作盛德升聞之舞曲舞作三成止出殿

中監進皇帝第三爵酒羣官立於席後登歌作嘉禾之
曲飲訖樂止殿中監受虛爵舍人就坐羣官皆坐太官
令行酒作正安之樂武舞進觴又行一周樂止尚食奉
御進食置御座前又設羣官食太官令奏酒周巡食遍
如前儀作天下大定之舞曲舞作三成止出殿中監進
皇帝第四爵酒登歌作靈芝之曲其禮如第三爵太官
令行酒如第二爵又一周樂止舍人曰可起百僚立於
席後侍中進當御座前俛伏跪奏侍中具官臣某言禮

畢俛伏興與羣官俱降復位贊者曰拜羣官皆再拜舞
蹈三稱萬歲再拜起分東西序立內侍承旨索扇扇合
殿下鳴蹕太樂令令撞蕤賓之鐘左五鐘皆應協律郎
跪俛伏舉麾興太樂令令奏乾安之樂鼓吹振作皇帝
降座御輿入自東房還閣扇開戛鼓樂止侍中奏解嚴
有司承旨放仗羣官再拜乃退

宋敏求又言考工記天子執冒四寸以朝諸侯未有
臨臣子而執鎮圭唐六典元正冬至大朝會止有進

爵之禮開寶通禮始著元會執圭出自西房淳化中
又以上壽進酒以內侍捧圭臣等遠稽周制近考唐
禮皆為未合其元會受朝賀請不執鎮圭上壽准此

宋朝正冬行大朝會禮

立班圖四
載卷末

太祖十一

建隆二年乾德四年五年六年開寶九年並元會

乾德三年四年五年開寶二年三年並冬會 建隆

二年五月受朝

太宗十一

太平興國五年六年八年雍熙三年淳化元年三年
並元會 太平興國二年端拱元年淳化四年並冬
會 太平興國三年九年並五月受朝

真宗八

咸平五年景德元年四年大中祥符六年並元會
咸平三年景德四年大中祥符八年並冬會 咸平
四年五月受朝

仁宗十

天聖五年慶歷元年三年七年皇祐五年嘉祐元年
七年並元會 天聖七年明道元年冬會 天聖八
年五月受朝

神宗三

熙寧五年元豐六年並元會 熙寧二年冬會

哲宗三

元祐五年紹聖三年並元會 元符元年五月受朝

徽宗四

大觀二年政和八年宣和六年並元會 政和二年

冬會

三年九月引進使李端慤言近朔望御文德殿視朝初
寒盛暑數煩清蹕而紫宸之朝歲中罕御請朔日御文
德既望坐紫宸庶幾正衙內殿朝儀並舉從之十一月
侍御史知雜事滿中行言文德正衙之制尚存常朝之
虛名襲橫行之謬例有司失於申請未能釐正兩省臺

官文武百官赴文德殿東西相向對立宰臣一員押班
聞傳不坐則再拜而退謂之常朝遇休假併三日以上
應內殿起居官畢集謂之橫行自宰臣親王以下應見
謝辭者皆先赴文德殿謂之過正衙然在京釐務之官
例以別勅免參宰臣押班近年已罷而武班諸衛本朝
又不常置故今之赴常朝者獨御史臺官與審官待次
階官而已今垂拱內殿宰臣以下既已日參而文德常
朝仍復不廢舛謬倒置莫此為甚至於橫行參假與夫

見謝辭官先過正衙雖沿唐之故事然必俟天子御殿之日行之可也

入一圖
在後

哲宗即位禮部言冬至正旦在諒闇當罷朝賀欲令羣臣於東上閣門內東門表賀從之

元祐七年五月吏部尚書王存言自今文德殿侍朝特免侍從官轉對專責以朝夕論思之效於體為得從之紹聖四年臣僚言文德殿侍朝輪官轉對蓋襲唐制其來久矣祖宗以來每遇轉對侍從之臣皆預元祐臣僚

請免侍從轉對續詔執事官權侍郎以上並免自此轉對止於卿監郎官而已請自今視朝轉對依元豐以前條制從之

元符元年令諸路監司朝辭日令閣門取旨上殿

徽宗重和元年臣僚言比年以來二三大臣奏對留身讒疏善良請求相繼甚非朝廷至公之體詔自今惟蔡京五日一朝許留身餘非除拜遷秩因謝及陳乞罷免並不許獨班奏事令閣門報御史臺彈劾

政和七年明堂成聽朝頒常視朔禮制局列上明堂七

議

見明堂門

宣和四年臣僚言祖宗舊制有五日一轉對者今惟月朔行之有許朝官轉對者今唯待制以上預焉比年以來緣明堂行視朝之禮歲不過一再而已則是畢歲而論思者無幾矣請過不視朔即令具章投進以備乙夜之觀從之

高宗紹興十二年十月臣僚言正旦一歲之首冬至一

陽之復聖人重之制為朝賀之禮上世以來未之有改
主上臨御十有六年正至朝賀初未嘗講豈艱難之際
不遑暇歟茲者太母還宮國家大慶四方來賀亶維其
時欲望自今冬至元正舉行朝賀之禮以明天子之尊
庶幾舊典不至廢墜

建炎之初鑾輿南幸庶事未備而朝會之儀未暇舉
焉正至但循例宰臣率文武百官拜表稱賀而已紹
興改元以道君皇帝淵聖皇帝北狩權宜皇帝躬率

百僚遙拜畢次御常御殿朝參官起居至是臣僚建言詔命有司舉行之

臣僚又奏乞明詔有司講求祖宗故實常朝視朝正衙便殿朝會之儀舉而行之以隆帝業用稱萬邦百辟尊君之心天下幸甚詔令禮部太常寺閣門同共討論尋討論在京月朔日文德殿視朝紫宸殿日參望參垂拱殿日參四參假日崇政殿坐聖節垂拱殿上壽今乞先次宰臣率百僚拜表奏請皇帝御正殿

視朝若降指揮許允其合行事務續令逐處條具申
請詔從之十一月三日權禮部侍郎王賞等言契勘
朝會之制正旦冬至及慶賀受朝係御大慶殿其文
德紫宸垂拱殿禮制不同月朔視朝則御文德殿謂
之前殿正衙仍設黃麾半仗其餘紫宸垂拱皆係側
殿不設儀仗今來已降指揮依臣僚所請乞降朝會
之儀緣元正在近大慶殿之禮事務至多欲乞先舉
行文德殿視朝之制其朝會合服朝服并設樂上壽

間飲三周設祥瑞表案等並乞候來年冬至前別行
取旨詔依從之

十三年閣門言依在京遇大禮年分冬至大朝會及次
年正旦朝會權罷

十四年九月有司言來年正旦大朝會請權以文德殿
合設黃麾大仗五千二十七人欲權減三分之一合設
八寶於御座之東西登歌宮架樂舞五輅輿輦法物繖
扇及諸州諸蕃貢物行在致仕官諸路貢士舉人在京

先生法師左右街道官等並令趁赴立班合差太史令一員奏雲物祥瑞詔從之

建炎以來朝野雜記大朝會者紹興十二年十月詔來歲舉行之王望之為禮部侍郎言排辦不及請自來年冬至既而不果十五年正月朔旦乃克行用黃仗三千三百五十人視東都舊儀損三之一時無大慶殿遂權於崇政殿行之以殿狹輦出房不鳴鞭他如故事是日設宮架樂百官朝服上壽如儀自是一

行而止

紹興三十二年九月

時孝宗已即位

閣門言太上皇帝巡幸以

來上御後殿繼朝廷復興舊典於紹興十三年二月四日初御前殿特令四參官起居伏自皇帝登寶位止係後殿日分今已降旨九月十二日初御前殿欲乞是日皇帝御垂拱殿四參官起居從之

隆興二年九月閣門言在京及行在舊例御前殿日分值雨雪及泥濘得旨放朝參郎改後殿坐今後乞依例

取旨從之

建炎以來朝野雜記舊羣臣朝殿遇雨開隔門起居
紹興中申行之又詔從駕遇雨賜雨具景靈宮遇雨
或地濕分東西廂立班皆特恩也

乾道七年四月詔為暑熱依年例自五月十三日並後
殿坐并放見謝辭及參假官候秋涼日取旨今後准此

合班圖

行禮即綴信加
除上諸號諸處

京官

宣徽南院使在北院使之上

知樞密院使在參政副使同知院事之上餘並以先後為次序
至副都頭
廂郎指揮使以下

僉書同僉書

宣徽使

左正言
左司諫

同知樞密院事

起居郎
左議大夫

樞密副使

給事中
左散騎常侍

參知政事

門下侍郎

知樞密院事

御史大夫

常侍立

防禦園練

次散騎

監察侍御史

夫中丞

殿中侍御史

如闕大

侍御史

御史中丞

知雜御史

師以下

射以下

書以下

丞以下

中以下

郎以下

外

富貴外

宰相樞密使

殿

親王

觀文殿

大學士

三司使

中書侍郎

監鐵使

二品諸衛

三品大將

四品率府

五品郎

觀文殿學士

右散騎常侍

度支副使

上將軍以下
軍以下

率以下

將以下

資政殿學士

右諫議大夫

戶部副使

翰林學士承旨

中書舍人

廂都指揮使以下

翰林學士

知制誥

至副都頭

資政殿學士

龍圖閣待制

端明殿學士

天章閣待制

翰林待講學士

龍圖閣直學士

龍圖閣學士

天章閣直學士

天章閣學士

寶文閣直學士

樞密承旨

樞密副承旨

諸州刺史

內殿承制東頭供奉官

寶文閣學士

延福宮使

樞密諸房副承旨

樞密直學士

景福殿使

樞密逐房副承旨

直翰林醫官院

節度使

客省使

客省副使以下

如帶升朝官歸

留後觀察使

宣慶使

本班立

如特恩全職

四方館使

通事舍人

節度使即於

宣政使

閣門祿候

此立如無旨

東高上閣門使

翰林醫官

即附本品仍

樞密都承旨

翰林待詔

立在同官之

前

翰林天文

朔日視朝儀注圖

排立僕奉官

修起居注

彈奏御史

吏部侍郎

給事中

刑法官

轉對官

文武官五十人

左金吾衛將軍

左金吾細仗

引駕官一名

四色官天各帶儀劍

紫金中奏管名

判殿中省官

排列官一名

扇一柄

方纛一柄

扇一柄

以上殿中設仗

兵部隊仗

排列纛長名

押隊員役人

黃麾幡八口

告止幡八口

傳教幡八口

信幡八口

龍頭竿五十條

戟五十條

左金吾細仗

青龍旗一口

東岳旗一口

赤龍旗一口

南岳旗一口

金龍旗一口

中岳旗一口

黃龍旗一口

西岳旗一口

黑龍旗一口

北岳旗一口

青龍旗一口

御馬五疋

瑞蘭三人各執儀仗

係金吾仗

殿 香案儀石

宣制石 文德殿門

朝堂門

兵部侍郎

右金吾衛將軍

右金吾細仗

引駕官一名

巡官二人各帶儀劍

鑾金中表二名

殿中省

排列官一名

扇一柄

方撤一柄

扇一柄

以上殿中省細仗

右金吾細仗

白虎旗一口

水星旗一口

黑鳳旗一口

木星旗一口

青鳳旗一口

土星旗一口

黃鳳旗一口

火星旗一口

赤鳳旗一口

金星旗一口

金鳳旗一口

御馬五疋

壇閣士人各執儀刀

兵部儀仗

排列儀仗

押隊儀仗

前導儀仗

告止儀仗

傳教儀仗

信歸入口

殿中省

戟五十條

右二圖見元豐間畢仲衍所進中書備對後圖同

正冬大慶殿朝會立班圖

起居郎

宰相

使相

參知政事

御史大夫

御史中丞

知雜御史

門下侍郎

如缺大夫

侍御史

左散騎常侍

即中丞次

給事中

散騎常侍

左諫議

起居郎

左司諫

左正言

節度使

左金吾衛上將軍

左金吾衛大將軍

左金吾衛將軍

左金吾衛將軍

文班

觀象閣後坐 五品郎中以下 六品郎中以下 高監監察御史

左巡使

一品太師以下 二品僕射以下 三品尚書以下 四品左右丞以下

大慶殿門

二品諸衛上將軍以下 二品諸衛大將軍以下

沙墀

武班

右巡使

四品率府率以下 五品以下金吾衛副將

右金吾衛將軍

右金吾衛將軍

右金吾衛大將軍

右金吾衛上將軍

觀察使

兩使留後

在同官之前

思令綴節度使即於此處
立如無旨即歸本品仍止

龍墀

龍圖閣直學士

樞密直學士

龍圖閣學士

侍讀學士

侍講學士

資政殿學士

翰林學士

資政殿大學士

文明殿學士

右正言

右司諫

起居舍人

待制

中書舍人

右諫議

右散騎常侍

中書侍郎

殿中侍御史

殿香案

親王

丹墀

大慶殿再坐上壽立班圖

知雜御史
侍御史

御史中丞
御史中丞
如閣
散立
贊立
贊立
贊立

御史大夫
門下侍郎
詹事府
給事中
左議大夫
起居郎
左司諫
左正言

參知政事

宰相

副使

文班

一品以下
二品以下
三品以下
四品以下
五品以下
六品以下
七品以下
監察御史

殿香案丹墀龍墀沙墀

親王

文明殿學士
資政殿學士
翰林學士
資政殿學士
侍講學士
侍讀學士
龍圖閣學士
樞密直學士
龍圖閣直學士

中書侍郎
右散騎常侍
右諫議大夫
中書舍人
待制
起居舍人
右司諫
右正言

殿中侍御史
鹽鐵副使
度支副使
戶部副使

節度使

兩使留後
觀察使
防禦團練使

契丹大使

管伴副使
契丹副使

武班

三品軍器將
三品軍器將
三品軍器將
四品軍器將
四品軍器將
五品軍器將
金將以下
金將以下

正冬御殿朝賀上壽垂拱殿樞密以下稱賀班圖

宣召閤門使

此一位起居
退後參此立

廷福宣使以下 皇城使以下 皇城副使以下 內殿承制供奉官以下

內殿省使

客省使以下

客省副使以下

通事舍人

翰林醫官以下

殿儀石樞密使

樞密使

知樞密院事

樞密副使

同知樞密院事

宣徽使

僉書同僉書樞密院事三司使 樞密都承旨 樞密承旨 樞密副都承旨

翰林天文書

基待詔以下

紫宸殿上壽賜酒圖

朵殿

宰臣參政事左右僕射李三少卿主

使相

太子師

製殿祭主

行禮書重主

製殿祭主

行禮書重主

製殿祭主

行禮書重主

翰林學士

行禮書重主

承旨學士

行禮書重主

寶端明學士

行禮書重主

侍讀傳講

行禮書重主

龍圖大章

行禮書重主

寶齊閣學士

行禮書重主

樞密院學士

行禮書重主

龍圖大章

行禮書重主

文閣學士

行禮書重主

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

左右學士

加火大

加火大

殿中侍御史

國子五博

左右司諫

四赤令博

諸行員部

太常宗正

左右正言

祕書丞

監察御史

著作郎

太常博士

殿中丞

五府少尹

六尚奉御

大理正

中允贊善

中允洗馬

司天五官正

館閣索官

學士院得詔

指揮使

副指揮

候戊都軍諸

御座

通事舍人侍立
通事舍人侍立

客省使以下侍立

樞密

宣徽

三司使內客省使

應遇宴會合侍上並初升

時於

御座之左稍南向西侍立及殿升殿即移近北向南侍立羣臣下殿即復歸初侍五位

既

王

即遣使

相王

諸衛上將軍
左右衛上將軍
六衛上將軍

金吾上將軍

諸衛大將軍

金吾大將軍

○殿下

諸衛將軍

率府將軍

中郎將

副率

郎將

朵殿

軍頭

都頭

副頭

進奉

押衙

馬使

諸蕃進奉使

進奉衙內指揮使

郎

侯

諸軍都虞候

文獻通考卷一百八